



# ÍSAFJARÐARBÆR

## ERINDISBRÉF

### Bæjarráð

#### 1. gr. Kosning bæjarráðs

Bæjarstjórn skal á fyrsta fundi að afloknum sveitarstjórnarkosningum kjósa þrjá bæjarfulltrúa í bæjarráð til eins árs og jafnmarga til vara. Fulltrúar eru síðan kosnir í júní ár hvert. Aðalfulltrúar í bæjarstjórn eru einir kjörgengir sem aðalmenn og varamenn í bæjarráð, sbr. 36. gr. sveitarstjórnarlaga. Bæjarstjórn kýs formann og varaformann bæjarráðs úr hópi kjörinna bæjarráðsmanna.

Í þeim tilfellum sem framboðslisti á einn aðalfulltrúa í bæjarstjórn er heimilt að kjósa varamann hans sem varafulltrúa hans í bæjarráði.

Bæjarstjóri á sæti í bæjarráði með málfrelsi og tillögurétt en atkvæðisrétt hefur hann því aðeins að hann sé bæjarfulltrúi og kjörinn í bæjarráð.

#### 2. gr. Undirbúningur og boðun bæjarráðsfunda

Bæjarstjóri undirbýr bæjarráðsfundi í samráði við formann bæjarráðs.

Hann sér um að bæjarráð sé boðað til fundar með skriflegu fundarboði í tölvupósti ásamt dagskrá a.m.k. hálfum sólarhring fyrir fund.

Geti bæjarráðsmaður ekki sótt fund skal hann í samráði við bæjarstjóra hlutast til um að varamaður verði boðaður.

Fundur telst lögmætur ef löglega er til hans boðað og meirihluti fulltrúa er mættur á fundinn. Bæjarráð getur enga bindandi ályktun gert nema fundur sé lögmætur.

#### 3. gr. Fundir bæjarráðs

Bæjarráð skal að jafnaði halda fundi einu sinni í viku. Aukafundi skal halda ef bæjarstjóri, formaður bæjarráðs eða a.m.k. tveir bæjarráðsmenn óska þess. Að jafnaði skal bæjarráðsfundur vera haldinn fyrir luktum dyrum. Einstaka starfsmenn bæjarins geta þó verið kvaddir til fundar af bæjarráði auk þess sem aðilum getur verið boðið á fund bæjarráðs til viðræðna um tiltekin mál.

Heimilt er að halda bæjarráðsfundi með síma- eða fjarfundabúnaði ef veður og færð hamla eðlilegum samgöngum. Slíka fundi má þó aðeins halda ef brýna nauðsyn ber til og ekki er hægt að fresta afgreiðslu þeirra mála sem á dagskrá fundarins eru að mati formanns bæjarráðs og bæjarstjóra.

Sé fjarfundur haldinn undirrita þeir sem ekki voru viðstaddir á fundinum fundargerð á næsta fundi eða á bæjarskrifstofu.

Að öðru leyti vísast til auglýsingar ráðherra, sbr. 2. mgr. 19. gr. sveitarstjórnarlaga um framkvæmd fjarfunda.

Bæjarráðsmaður skal gæta þagmælsku um atriði er hann fær vitneskju um í starfi og leynt skulu fara samkvæmt lögum eða eðli málsins. Pagnarskyldan helst eftir að bæjarráðsmaður hefur látið af störfum.

#### **4. gr. Afgreiðsla mála í bæjarráði**

Mál er afgreitt í bæjaráði með því að samþykkja það eða fella, vísa frá eða vísa því til afgreiðslu ráðs, bæjarstjórnar eða bæjarstjóra. Ráðið getur vísað málum til umsagnar annarra ráða, fagnefnda eða bæjarstjóra. Fulltrúi bæjarráðs á rétt á því að fá bókaða stutta athugasemd um afstöðu sína til máls sem er til meðferðar hjá ráðinu. Heimilt er að hafa bókannir lengri þegar fjallað er um frumvarp að fjárhagsáætlun og ársreikninga.

Bæjarráði er heimilt að fresta afgreiðslu máls nema lög kveði á um að það skuli afgreitt fyrir tiltekinn tíma.

Fulltrúa bæjarráðs ber að víkja sæti við meðferð og afgreiðslu máls þegar það varðar hann eða nána venslamenn hans svo sérstaklega að almennt má ætla að viljaafstaða hans mótist að einhverju leyti þar af eða þegar til staðar eru aðrar ástæður sem koma fram í 3. gr. Laga nr. 37/1993. Fulltrúi sem vanhæfur er við úrlausn máls skal yfirgefa fundarstað við meðferð og afgreiðslu þess. Fulltrúa sem veit hæfi sitt orka tvímælis ber að vekja athygli bæjarráðs á því.

#### **5. gr. Stjórnun bæjarráðs**

Formaður bæjarráðs stjórnar fundum þess og sér um að allt fari löglega og skipulega fram á fundum þess. Hann úrskurðar í ágreiningsmálum sem upp kunna að koma út af fundarsköpum en bera má úrskurði hans undir bæjarráð. Heimilt er að taka mál til meðferðar í bæjarráði þótt ekki sé það tilgreint í dagskrá. Þó er skylt að fresta afgreiðslu slíks máls ef einhver bæjarráðsmaður óskar þess.

Bæjarritari er ritari bæjarráðs. Um ritun fundargerða bæjarráðs skal fylgt leiðbeiningum um ritun fundargerða sveitarstjórna sem ráðuneyti setur sbr. 2. mgr. 19. gr. sveitarstjórnarlaga.

#### **6. gr. Áheyrnarfulltrúar í bæjarráði**

Framboðsaðila sem fulltrúa á í bæjarstjórn en ekki hefur fengið kjörinn bæjarráðsmann er heimilt að tilnefna áheyrnarfulltrúa til setu í bæjarráði. Skylt er bæjarstjórn að gefa fulltrúa flokks/framboðsaðila sem sæti á í bæjarstjórn kost á setu í bæjarráði með málfrelsi og tillögurétt þann tíma sem fundir bæjarstjórnar falla niður vegna sumarleyfa.

Áheyrnarfulltrúi og varaáheyrnarfulltrúi í bæjarráði skulu vera aðalmenn í bæjarstjórn, sbr. 3. mgr. 50. gr. sveitarstjórnarlaga, að undanskildum tilvikum sem geta fallið undir 2. mgr. 1. gr. erindisbréfs þessa.

#### **7. gr. Verkefni bæjarráðs**

Bæjarráð fer ásamt bæjarstjóra með framkvæmdastjórn sveitarfélagsins og fjármálastjórn að því leyti sem slík stjórn er ekki öðrum falin. Bæjarráð hefur umsjón með stjórnsýslu sveitarfélagsins, undirbúningi árlegrar fjárhagsáætlunar, semur drög að fjárhagsáætlun

bæjarsjóðs og stofnana hans og fyrirtækja að fengnum tillögum hlutaðeigandi nefnda og stjórnanna og leggur þau fyrir bæjarstjórn í samræmi við ákvæði sveitarstjórnarlaga. Þá sér bæjarráð um að ársreikningar bæjarsjóðs séu samdir og þeir ásamt ársreikningum stofnana og fyrirtækja sveitarfélagsins lagðir fyrir bæjarstjórn til afgreiðslu svo sem sveitarstjórnarlög mæla fyrir um.

Auk þess fer bæjarráð með verkefni kjaranefndar og starfskjaranefndar. Bæjarráð tilnefnir fulltrúa í stjórn héraðsskjalasafns og Bygðasafns Vestfjarða. Tilnefningar bæjarráðs eru háðar samþykki bæjarstjórnar.

Meðan á sumarleyfi bæjarstjórnar stendur fer bæjarráð með sömu heimildir og bæjarstjórn hefur ella. Þá getur bæjarstjórn falið bæjarráði fullnaðarafgreiðslu mála nema lög mæli á annan veg.

## 8 gr. Heimild bæjarráðs til fullnaðarákvörðunar

Bæjarráð gerir tillögur til bæjarstjórnar um afgreiðslu einstakra mála sem það fær til meðferðar. Bæjarráði er þó heimil fullnaðarafgreiðsla mála sem ekki varða verulega fjárhag bæjarsjóðs eða stofnana hans, enda sé ekki ágreiningur milli bæjarráðsmanna eða við bæjarstjóra um slíka afgreiðslu.

Bæjarráð ákveður skiptingu og ráðstöfun fjár sem ætlað er til einstakra málaflokka samkvæmt fjárhagsáætlun, svo sem til gatnagerðar, nýbygginga og óvissra útgjalda. Vald til fullnaðarafgreiðslu máls getur aldrei falið í sér vald til töku ákvörðunar sem gengur gegn fjárhagsáætlun eða öðrum almennum og bindandi reglum eða áætlunum sem bæjarstjórn hefur sett.

Fullnaðarákvarðanir sem teknar hafa verið sæta ekki eiginlegu málskoti innan stjórnarsýslu sveitarfélagsins, heldur getur aðili máls átt rétt á endurupptöku ákvörðunar, sbr. 24. gr. stjórnarsýslulaga nr. 37/1993.

Ef óskað er endurupptöku máls sem bæjarráð hefur afgreitt, sbr. 3. mgr. 6. gr., skal leggja það fyrir bæjarstjórn til endanlegrar afgreiðslu.

## 9. gr. Gildistími

Erindisbréf þetta byggist á ákvæðum sveitarstjórnarlaga nr. 138/2011 um verkefni sveitarfélaga og starfsemi nefnda á þeirra vegum, stjórnarsýslulögum nr. 37/1993 og samþykkt um stjórn Ísafjarðarbæjar og fundarsköp bæjarstjórnar. Erindisbréf þetta hefur verið tekið fyrir í bæjarráði og bæjarstjórn Ísafjarðarbæjar þann (*dagsetning*) og gildir frá þeim tíma þar til annað kann að verða ákveðið.

*(dagsetning)*

---

Gísli Halldór Halldórsson,  
bæjarstjóri